

FEDERICO GONZÁLEZ-FIERRO BOTAS, S.J.

Uviéu, 30/11/1942 - Vladivostok, Rusia, 28/06/2002

Sacerdote xesuita, llicenciáu n'Historia y diplomáu en Llingües Clásiques, con doctoraos en Teoloxía, Ciencies Polítiques y Socioloxía.

Foi cura obreru nos años 60 y 70 del sieglu XX, trabayando d'empleáu manual de fábricas, carteru y otros en Cataluña, Galicia y Europa. Nesi tiempu entra en contactu col sindicalismu y collabora con delles organizaciones obreres, sobremanera en materia de formación sindical de los sos militantes.

Viaxa en numberoses ocasiones a la Xunión Soviética onde surde'l so interés pola cultura rusa hasta convertise n'espertu en llingua y lliteratura rusa, de la que tornó al asturianu les obres llíriques d'A.S. Pushkin.

Ente 1975 y 1984 vive en Vigo, onde foi profesor nes Escueles Universitaries de Formación del Profesoráu d'EXB y de Graduados Sociales, y nun Institutu d'Enseñanza Media. Col estudiu "Reflexión ético-política ante o referéndum do Estatuto de Autonomía para Galicia", espublizáu na revista "Encrucillada" nel 1980 recibe'l XXIII Premiu periodísticu Fernández Latorre de "La Voz de Galicia".

Regresó a Asturias en 1984 como Xefe d'estudios y profesor de la Fundación Revillaxixéu, de Xixón, siendo nombráu en 1988 Presidente del Colectivu Manuel Fernández de Castro, dedicáu a la recuperación de la lengua y cultura asturianas dende los valores del humanismu cristianu.

Foi Asesor de "Xusticia y Paz d'Asturies" dende 1985.

Xixón | **Cultura
y Educación**

Oficina de Normalización Llingüística





La Conceyalía d'Educación, Cultura, Xuventú y Fiestes del Conceyu de Xixón, nel so enfotu de facer acordanza de la figura de don Federico González-Fierro Botas y la so querencia pola llingua de nueso y la so normalización social, convoca la sétima edición del Premiu d'Ensayu y Trabajos d'Investigación “Fierro Botas”.

Esti premiu empobínase a aquelles obres d'ensayu o trabayos d'investigación, nos que se recueyan los siguientes ámbitos: investigación sobre la cultura asturiana; investigación sobre la cultura rusa o eslava; la memoria social y colectiva de los pueblos rusu y asturianu; la memoria social y colectiva de Xixón.

BASES

1. Podrán presentase a esti Premiu toles persones con ensayos o trabayos d'investigación en llingua asturiana que respueñan al enfotu del Premiu.
2. Les obres presentaes han tar roblaes con nomatu; amás entregaráse, nun sobre zarráu, el nome, los apellíos y les señes de contautu del so autor/a. Esti sobre va mantene zarráu, cola esceición del orixinal qu'algame'l premiu.
3. El llargor de los ensayos nun ha ser de menos de 50 fueyes DIN-A4 con 2.500 caracteres máximo per páxina. Les obres han presentase impresas a una cara. Na so entrega, les obres han tar peracabaes, ensin posibilidá d'amestar, suprimir o cambiar nenguna parte de les mesmes. Los ensayos han entregase por triplicáu en cualesquier de los Rexistros del Ayuntamientu de Xixón. Nel sobre ha figurar la referencia: PREMIU D'ENSAYU Y TRABAYOS D'INVESTIGACIÓN “FIERRO BOTAS” 2014. CONCEYALÍA D'EDUCACIÓN, CULTURA, XUVENTÚ Y FIESTES. L'autor/a va recibir un documentu acreitativu de la so presentación; esti recibu va ser necesariu pa retirar les obres contemplaes nel artículu 13 d'estes bases.
4. Amás del testu podrán presentase los conteníos suplementarios al mesmu que l'autor/a camiente afayadizo.
5. Concederáse un premiu de 3.000 € y la so publicación, a la obra que pola unanimidá, o nel so defeutu pola mayoría de los votos del xuráu, tenga los mayores méritos.
6. El pagu del premiu implica'l reconocimientu y aceptación del autor/a del derechu de publicación de la primer edición de la obra, pola Conceyalía d'Educación, Cultura, Xuventú y Fiestes del Conceyu de Xixón. L'abonu va facese na cuenta bancaria conseñada pola persona premiada.
7. El plazu d'entamu pa la presentación de los orixinales ye'l día dempués de la espublización na prensa y/o na páxina web del Conceyu del anunci de la convocatoria del Premiu. L'almisión d'orixinales acaba'l día 10 d'ochobre de 2014 inclusive, y el Premiu va fallase'l día 25 de payares de 2014.
8. La presentación de les obres dientro del plazu enantes mentáu, implica'l compromisu del autor/a de non retirar el so orixinal anantes de dar anuncia'l xuráu del so fallu. Asina mesmo, al presentar un trabayu, l'autor/a, acepta toles condiciones amosaes nestes bases.
9. Los trabayos presentaos han ser inéditos y orixinales y tar escritos acordies coles normes ortográfiques de l'Academia de la Llingua. De nun se cumplir estos requisitos, la obra nun podrá algamar el Premiu.
10. El xuráu va tar integráu por un representante de la familia González-Fierro, representantes del mundu cultural asturianu y por un representante de la Conceyalía d'Educación, Cultura, Xuventú y Fiestes del Conceyu de Xixón, qu'exercerá la so presidencia.
11. Si al xuráu-y abulta oportuno, pol so interés, proponer la publicación de dalguna de les obres presentaes, y n'alcordándolo col so autor/a, la Conceyalía d'Educación, Cultura, Xuventú y Fiestes del Conceyu de Xixón podrá facer la so publicación. Ésta nun va conllevar en nengún casu una compensación económica.
12. L'autor/a comprométese a roblar los compromisos necesarios pa que la edición de la so obra tea inscrita nel Rexistru de la Propiedá Intelectual, y de dase'l casu, nel de la Propiedá Industrial del Estáu. Asina mesmo l'autor/a podrá alcordar la llicencia de publicación del so ensayu.
13. Les obres orixinales non premiaes devolveránse, si l'autor/a lo pide, nos dos meses siguientes al fallu del xuráu.
14. Les obres que nun se vayan publicar y que nun se reclamen per escrito primero del 28 de febreru de 2015, van destruyise, ensin que pa esta decisión esista nengún recursu. La Conceyalía d'Educación, Cultura, Xuventú y Fiestes del Conceyu de Xixón comprométese a mirar pola bona conservación de los orixinales.
15. Si'l xuráu lo camienta afayadizo, el Premiu podría quedar ermu.
16. Por decisión del xuráu'l premiu va poder ser declaráu ex-aequo. Nesti casu la cuantía del premiu va repartise ente les persones ganadores, comprometiéndose la Conceyalía d'Educación, Cultura, Xuventú y Fiestes del Conceyu de Xixón, en tou casu, a la publicación de los trabayos ganadores.
17. La decisión del xuráu ye inapelable.